

四庫全書

史部

欽定四庫全書

關中勝蹟圖志卷十八

陝西巡撫臣畢沅撰

古蹟

宮闕

鳳翔府殷岐陽宮雍勝略故基在岐山縣東北五十里  
即周太王由豳遷岐所建今宮廢而土人猶稱之 臯  
門在岐陽城內周太王所立詩乃立臯門臯門有仇  
應門在臯門內亦周太王所立詩乃立應門應門將將

秦平陽封宮通志在郿縣故平陽城內郊祀志雍大雨  
壞平陽宮垣史記武公元年伐彭戲氏至於華山下居  
平陽封宮雍錄云在華山下蓋因史記至於華山之文  
而誤也

羽陽宮通志在寶雞縣陳倉故城內澠水燕談錄秦武  
公作羽陽宮在寶雞縣界歲久不可究知其處元祐六  
年正月直縣門之東百步居民權氏濬池得古銅瓦面  
上隱起四字曰羽陽千歲篆字隨勢為之不取方正始

知為羽陽舊址也其地北負高原南臨渭水前附羣峰  
形勢雄壯真勝地也

大鄭宮左傳注鳳翔縣南七里有古雍城秦德公所居  
大鄭宮城也史記秦本紀德公元年初居雍城大鄭宮  
高泉宮雍勝略在扶風縣東美陽故城長安志秦宣太  
后起

號宮三輔黃圖秦宣太后起在岐州號縣界

棧陽宮雍勝略在扶風縣東北三十里秦穆公建遺址

尚存

謹按長安志謂棧陽宮為秦昭王起與此異

祈年宮通志即橐泉宮在鳳翔府城內東南隅雍錄酈道元水經注曰雍縣中牢

與牢同

井秦惠公故居所謂祈

年宮也孝公又謂之橐泉宮据酈此言則是惠公所都雍縣有祈年宮至孝公命為橐泉名雖兩出其實一宮也又推酈此言則是祈年橐泉皆在惠公雍都亦不知何人所建獨漢書曰祈年宮惠公所起黃圖祈為蕝且曰穆公所造廟記曰宮在城外而始皇本紀則曰在雍

皆以世遠難究其的也雍勝略後人又於此建祈年觀  
漢回中宮一統志在鳳翔縣三輔黃圖回中宮在汧拈  
地志回中秦故宮在雍州西四十里

隋仁壽宮通志在麟遊縣西五里通鑑文帝詔楊素營  
仁壽宮於岐山之北素奏宇文愷封德彝為土木監於  
是夷山堙谷以立宮殿崇臺累榭宛轉相屬

岐陽宮通志在鳳翔縣城內開皇六年建

安仁宮一統志在郿縣東隋志郿縣有安仁宮開皇十

五年置行宮十二所自京師以達仁壽宮此其一也唐貞觀十八年自九成宮還至安仁宮即此通志又有鳳泉宮亦隋離宮

唐九成宮唐書地理志在麟遊縣西五里本隋仁壽宮貞觀五年復置更名永徽二年曰萬年宮乾封二年復曰九成宮周垣千八百步並署禁苑及府庫官寺元和郡縣志每歲避暑春往冬還義寧元年廢宮置郡縣貞觀五年復修舊宮以為避暑之所改名九成縣志宮在

縣西天臺山上中有碧城及排雲御容等殿今遺址無

考惟九成萬年兩古碑尚存金石文字記唐九成宮醴

泉銘魏徵撰歐陽詢書又萬年宮銘高宗御製并書二

碑並存

唐魏徵九成宮醴泉銘維貞觀六年孟夏之月皇帝避暑乎九成之宮此則隋之仁壽宮也冠

山構殿絕壑為池跨水架楹分巖竦闕高閣周建長廊四起棟宇膠葛臺榭參差仰視則迢遞百尋下臨則呼

噪千仞珠壁交映金碧相輝照灼雲霞蔽虧日月觀其移山迴澗窮泰極侈以人從欲良足深尤至於炎景流

金無鬱蒸之氣微風徐動有淒清之涼信安體之佳所誠養身之勝地漢之甘泉不能尚也皇帝爰在弱冠經

營四方逮乎立年撫臨億兆始以武功一海內終以文德懷遠人東越青邱南踰丹徵皆獻琛奉幣重譯來王



西暨輪臺北拒元闕並地列川縣人充編戶氣淑年和  
邇安遠懷羣生成遂靈貺畢臻雖藉二儀之功終資一  
人之慮遺身利物拂風沐雨百姓為心憂勞成疾同堯  
肌之如腊甚禹足之胼胝針石屢加膝理猶滯爰居京  
室每弊炎暑羣下請建離宮庶可怡神養性聖上愛一  
夫之力惜十家之產深閉固拒未肯俯從以為隋氏舊  
宮營於叢代棄之則可惜毀之則重勞事貴因循何必  
改作於是斷雕為樸損之又損去其太甚葺其頽壞雜  
丹墀以砂礫間粉壁以塗泥玉砌接於土階茅茨續於  
瓊室仰觀壯麗可作鑒於既往俯察卑儉足垂訓於後  
昆此所謂至人無為大聖不作彼竭其力我享其功者  
也然昔之池沼咸引谷澗宮城之內本乏水源求而無  
之在乎一物既非人力所致聖心懷之不忘粵以四月  
甲申朔旬有六日巳亥上及中宮歷覽臺觀閒步西城  
之陰躊躇高閣之下俯察厥土微覺有潤因而以杖導  
之有泉隨而湧出乃承以石檻引為一渠其清若鏡味

甘如醴南注丹霄之右東流度於雙闕貫穿青鎖紫帶  
紫房激揚清波滌蕩瑕穢可以導養正性可以激瑩心  
神鑒映羣形潤生萬物同悲思之不竭將元澤之常流  
匪惟乾象之精益亦神靈之寶謹按禮緯云王者刑殺  
當罪賞錫當功得禮之宜則醴泉出於闕廷鶚冠子曰  
聖人之德上及太清下及太寧中及萬靈則醴泉出瑞  
應圖曰王者純和飲食不貢獻則醴泉出飲之令人壽  
東觀漢記曰光武中元元年醴泉出於京師飲之者痼  
疾皆愈然則神物之來實扶明聖既可蠲茲沈痼又將  
延彼遐齡是以百辟卿士相趨動色我后固懷挹挹推  
而弗有雖休勿休不徒聞於往昔以祥為懼實取驗於  
當今斯乃上帝元符天子令德豈臣之末學所能丕顯  
但職在記言屬茲書事不可使國之盛美有遺典策敢  
陳實錄爰勒斯銘其詞曰惟皇撫運奄有寰宇千載膺  
期萬物斯覩功高大舜勤深伯禹絕後光前登三邁五  
握機蹈矩乃聖乃神武克禍亂文懷遠人書契未紀開

關不臣冠冕並襲琛贊咸陳大道無名上德不德元功  
潛運幾深莫測鑿井而飲耕田而食靡藉天功安知帝  
力上天之載無臭無聲萬物資始品物流形隨感變質  
從德效靈介馬如響赫赫明明難遐景福歲蕤繁祉雲  
氏龍宮龜圖鳳紀日含五色鳥呈三趾頌不輟工筆無  
停史上善降祥上知斯悅流謙潤下潺湲皎潔萍旨醴  
甘氷凝鏡澈用之日新挹之無竭道隨時泰慶與泉流  
我后夕惕雖休勿休居崇茅宇樂不般遊黃屋非貴天  
下為憂人玩其華我取其實還淳反本代文以  
質居高思堅持滿戒溢念茲在茲永保貞吉

永安宮雍錄貞觀八年置在麟遊縣西

古蹟

苑園附  
第宅

鳳翔府周尹喜故宅偃曝餘談寶雞縣有尹喜故宅張

三丰邱長春馬丹陽王重陽劉綱樊夫人秦弄玉仙跡  
往往而在第虎豹熊羆時出伺人有獨角獸樵者見其  
卧林間或搏虎而食之食輒餘其半山家每得殘虎以  
飽

唐李茂貞園通志在鳳翔縣東北五里光啟中茂貞節  
度鳳翔時建脩竹萬竿內有竹閣傍引溪水灌之

宋蘇軾李

氏園詩朝遊北城東回首見脩竹下有朱門家破牆園  
古屋舉鞭叩其門幽響答空谷入門所見夥十步九移  
目異花兼四方野鳥喧百族具西引溪水活活轉牆曲  
東注入深林林深牕戶綠水光兼竹淨時有獨立鵲林

中百尺松歲久蒼鱗感豈惟此地少意恐闕中獨小橋  
過南圃夾道多喬木隱如城百雉挺若舟千斛陰陰日  
光淡黯黯秋氣蓄盡東為方池野雁雜家鶯紅梨驚合  
抱映烏孤雲馥春光水溶漾雪陣風翻撲其北臨長溪  
波聲卷平陸北山卧可見蒼翠間硤禿我時來周覽問  
此誰所築云昔李將軍負險乘衰叔抽錢算間口但未  
權羹粥當時奪民田失業安敢哭誰家美國圓籍殄不  
容贖此亭破千家鬱鬱城之麓將軍竟何事蟻強生刀  
韜何嘗載美酒來此駐車數空使後世人聞名頸猶縮  
我今官正閒屢至因休沐人生營居止竟為何人卜何  
當辦一身永與清景逐

汧陽閣一統志在汧陽縣治南

唐常莊汧陽閣詩汧水  
悠悠去似舩遠山如畫

翠眉橫僧尋野渡歸吳嶽雁帶斜陽入渭城邊靜不收  
蒼悵馬地貧惟賣隴山鸚牧童何處吹羌笛一曲梅花

出塞  
聲

一經堂一統志在隴州治東刺史韋臯建取韋賢教子  
一經之義

賣酒樓一統志在寶雞縣東陳倉故城內自唐至宋中  
更兵燹獨存此樓宋蘇軾詩云曉入陳倉縣惟餘賣酒  
樓謂此

宋會景亭一統志在鳳翔縣城外南溪處衆亭之間蘇  
軾遷之水西可以遠眺又改名招隱題詩其上

宋蘇軾  
會景亭

詩飛簷臨占道高榜勸遊人未即令公隱聊須濯路塵  
茅茨分聚落烟火傍城闌林缺湖光漏牕明野意新居  
民惟白帽過客謾朱輪山好留歸屐風回落醉巾他  
年誰改築舊製不須因再到吾雖老猶堪作坐賓

喜雨亭通志在鳳翔縣東北蘇軾判郡時建鑿池其南

引流種樹為休息之所自為文記之

宋蘇軾喜雨亭記亭以雨名志喜也

古者有喜則以名物示不忘也周公得禾以名其書漢  
武得鼎以名其年叔孫勝狄以名其子其喜之大小不  
齊其示不忘一也余至扶風之明年始治官舍為亭於  
堂之北而鑿池其南引流種樹以為休息之所是歲之  
春雨麥於岐山之陽其占為有年既而彌月不雨民方  
以為憂越三月乙卯乃雨甲子又雨民以為未足丁卯  
大雨三日乃止官吏相與慶於庭商賈相與歌於市農  
夫相與抃於野憂者以樂病者以愈而吾亭適成於是

舉酒於亭上以屬客而告之曰五日不雨可乎曰五日不雨則無麥十日不雨可乎曰十日不雨則無禾無麥雖欲優游以樂於此亭其可得耶今天不遺斯民始旱而賜之以雨使吾與二三子得相與優游而樂於此亭者皆雨之賜也其又可忘耶既以名亭又從而歌之曰使天而雨珠寒者不得以為襦使天而雨玉饑者不得以為粟一雨三日繫誰之力民曰太守太守不有歸之天子天子曰不然歸之造物造物不自以為功歸之太空太空冥冥不可得而名吾以名吾亭

武成樓一統志在寶雞縣東三十里武成鎮宋陳希亮守鳳翔時建

斯飛閣一統志在寶雞縣西南

宋蘇軾斯飛閣詩西南歸路遠蕭條倚檻魂飛



不可招野潤牛羊同雁鶩天長草樹接雲霄昏昏水氣  
浮山麓汎汎春風弄麥苗誰使愛官輕去國此身無計

老漁  
想

翠麓亭一統志在寶雞縣東南一百八十里青峰寺旁

石林亭一統志在麟遊縣東宋劉敞有詩蘇軾和之  
宋蘇軾

軾石林亭詩都城日荒廢往事不可還惟餘故苑石漂  
散向人間公來始購蓄不憚道里艱忽從塵埃中來對  
冰雪顏瘦骨拔凜凜蒼根漱潺湲唐人惟奇章好石古  
莫攀盡令屬牛氏刻鑿終班班嗟此本何常聚散實循  
環人失亦人得要不出區寰君看劉季末不能保河關  
況此百株石鴻毛於太山但當對石飲萬事付等閒

張橫渠宅一統志在郢縣東五十里橫渠鎮南大振谷

口

古蹟

祠宇

鳳翔府上古倉頡廟通志在岐山縣西南五里縣志舊在渭河之南歲久岸地明嘉靖中改建於河北原上

姜嫄廟通志在扶風縣東南四十里郿城鎮內

夏禹廟一統志在岐山縣東十三里有古栢九十四株枝悉西向

周太王廟通志在岐山縣東北十五里岐陽舊地創建

無攷金重慶元年重修後圯誤傳為赧王廟明正統間  
行人郭仲南過岐訪周遺址得石碣乃知為太王廟知  
縣王澤重修仲南撰記一統志廟側又有王季及文王  
廟

秦伯廟一統志在岐山縣西北十里寇村

三公廟一統志在鳳翔縣東郭內祀周公召公太公配  
以蜀漢諸葛亮宋張子

周公廟通志在岐山縣西北十五里鳳凰山麓唐武德

間建宋元祐元年重修一統志有姜嫄廟在廟後府志有太姜太任太姒三廟在姜嫄廟東

姜太公廟通志在寶雞縣東南六十里磻溪側磻溪東北流入渭廟居其右廟左有釣石石根著土甚微盤旋而上至頂平廣雙穴膝跡顯然當時坐而持竿之所也鳳女祠通志在鳳翔縣南五十里其地有鳳女臺相傳秦穆公築以居蕭史弄玉者後人因臺作祠以祀

陳寶祠一統志在寶雞縣東二十里史記秦文公獲若

石於陳倉北坂城祠之祀以一牢命曰陳寶列異傳秦  
穆公時陳倉人掘地得物若羊非羊若猪非猪牽以獻  
穆公逢二童子曰此為媼述常在地中食人腦若欲殺  
之以栢插其首媼曰此二童子名為雞寶得雄者王得  
雌者霸陳倉人舍之逐二童子化為雉飛入於林陳倉  
人告穆公發徒大獵得其雌又化為石置之汧渭之間  
至文公立祠名陳寶縣志祀雞臺址尚存

漢三班祠一統志在扶風縣南飛鳳山祀班彪及子固

超又曹大家祠亦在此山

伏波祠通志在扶風縣東四十里祀馬援

馬超廟一統志在扶風縣茂陵山下元延祐二年建通志即超故居地

諸葛武侯廟通志在岐山縣南五丈原

魏鄧艾祠通志在鳳翔縣北十里

隋文帝廟通志在扶風縣東四十五里每歲春秋祀

西鎮吳山廟通志在隴州南七十里吳嶽山下隋開皇

十六年準西鎮吳山造神廟唐李晟鎮鳳翔時禱雨有  
應于公異為記冊府元龜清泰元年正月壬申詔吳嶽  
成德公可進封靈應王初帝在鳳翔遣房嵩祀之有應  
至是欲加封爵下有司簡討天寶十載正月封吳山神  
為成德公至德二年十二月改吳山為嶽祠享官屬視  
五嶽今國家以靈告祥宜示殊等故有是命宋史開寶  
六年遣使奉衣冠劍履送西鎮吳嶽廟立秋日祀西鎮  
吳山於隴州舊封成德公元豐八年封王元史大德二

年二月加封西鎮吳山為成德永靖王至元三年定歲祀嶽鎮之制七月土王日記吳山於隴州界續文獻通考明洪武三年詔嶽鎮海瀆英靈之氣受命上帝豈國家封號可加命依古制止以山水本名稱西鎮吳山之神十二年遣官賜金香盒一座有司祭服二襲永樂二年敕修五年災知州張幹重建

本朝康熙四十二年五月

賜額曰五峰挺秀每歲春秋有司修其常祀



唐韓文公祠一統志在扶風縣北崇正鎮

段太尉祠通志一在汧陽縣南一里一在縣西北四十里祀唐段秀實唐書興元元年詔贈太尉謚忠烈帝還都又詔致祭旌其門閭親銘其碑太和中子伯倫始立廟有詔給鹵簿賜度支綾絹五百以少牢致祭

太白山神廟通志在郿縣東南四十里太白山上唐天寶八載封山神為神應公貞元十二年秋旱詔飾祠廟翌日大雨黍稷用豐宋至和三年封神為濟民侯嘉祐

七年復封為明應公熙寧八年進封福應王金元俱仍  
王爵明正統四年重建廟東坡志林太白山神至靈自  
昔禱無不應近歲向公少師為守奏封山神為濟民侯  
自此禱不應偶取唐會要看云天寶十四年詔封山神  
為靈應公吾然後知神之所以不悅者即告太守遣使  
禱之若應當奏乞復公爵旦以瓶取水歸郡遂大雨三  
日吾作奏檢具言其狀詔封明應公且修其廟祀之日  
有白鼠長尺餘歷酒饌上嗅而不食父老曰龍也

臣謹按太白山靈湫數處歷代以來久著神異關中每於望澤之時凡有禱祈咸昭丕應乾隆五年川陝督臣尹繼善奏請列入本省祀典臣蒙

簡命巡撫陝西於乾隆二十九年三月霖霖偶愆禾苗待澤

臣敬率僚屬步禱西安神廟復遣官赴山於靈湫取水立沛甘霖四野霑足經臣奏請

特賜封號蒙

恩敕加昭靈普潤四字用答神庥其神廟之在山中者舊制

庫隘臣復捐俸飭邵令重葺治歲時致祭底明神  
顧享益多嘉應焉

玉皇廟通志在寶雞縣東南六十里相傳唐縣尹劉綱  
夫婦登仙處

靈義侯祠通志在隴州城內唐大厯二年故郡壘艱於  
得水荀氏夫婦獻地因遷城於此勅封為靈義侯靈順  
夫人立祠以祀有禱屢應宋太祖時改封安祐侯

開元寺通志在鳳翔縣城內開元中建聞見後錄大殿

九間後壁吳道子畫自佛始生修行說法至滅度山林  
宮室人物禽獸數千萬種極古今天下之妙其識開元

三十年云

宋蘇軾記所見開元寺吳道子畫佛滅度以  
答子由詩西方真人誰所見衣被七寶從雙

後當時修道頗辛苦栢生兩肘烏巢肩初如濛濛隱山  
玉漸如濯濯出水蓮道成一旦就空滅奔會四海悲人  
天翔禽哀響動林谷獸鬼躑躅淚迸泉麗眉深目彼誰  
子遶牀彈指性自圓隱如寒月墮清查空有孤光留故  
躔春遊古寺拂塵壁遺像久此霾香烟畫師不復寫名  
姓皆云道子口所傳從橫固已蔑孫鄧有如巨鰐吞小  
鮮來詩所誇孰與此  
安得搗挂其旁觀

天柱寺鳳翔縣志在縣北三里舊有楊惠之塑維摩像

唐李洞宿鳳翔天柱寺窮易元上人房詩天柱暮相逢  
吟思天柱峰墨研青露月茶吸白雲鍾卧語身枯薛行  
禪頂拂松探元為一決明月去臨邛宋蘇軾維摩像唐  
楊惠之塑在天柱寺詩昔者子輿病且死其友子祀往  
問之跼蹐鑒井自歎息造物將安以我為今觀古塑維  
摩像病骨磊鬼如枯龜乃知至人外生死此身變化浮  
雲隨世人豈不頽且好身雖未死身已疲此叟神完中  
有恃談笑可却千熊羆當其在時或問法俛首無言心  
自知至今遺像兀不語與昔未死無增虧田翁俚婦那  
肯顧時有野鼠銜其髭見之使人每自失誰能與語無  
師言

普門寺通志在鳳翔縣東一里唐建金大定六年修明

正德八年重修舊有唐王維吳道子畫

宋蘇軾王維吳道子畫詩何處

訪吳畫普門與開元開元有東塔摩詰留手痕吾觀畫  
品中莫如二子尊道子實雄放浩如海波翻當其下手  
風雨快筆所未到氣已吞亭亭雙林間彩暈扶桑暇中  
有至人談寂滅悟者悲涕迷者手自捫捫蠻君鬼伯千萬  
萬相排競進頭如鼇摩詰本詩老佩芷襲芳蓀今觀此  
壁畫亦如其詩清且敦祇園弟子畫鶴骨心如死灰不  
復溫門前兩叢竹雪節貫霜根交柯亂葉動無數一一  
皆可尋其源吳生雖妙絕猶以畫工論摩詰得之於像  
外有如仙翻謝龍樊吾觀二子皆神俊又于維也斂衽  
無間言人獨遊普門寺有憶子由詩花開美酒盡不歸  
來看南山冷翠微憶弟淚如雲不散望鄉心與雁南飛  
明年縱健人應老昨日追歡意正違不問秋風強吹帽  
秦人不笑  
楚人譏

耆閣寺通志在岐山縣東北四十里崛山下唐乾寧四

年建石磴崎嶇巖洞峭絕春時人多遊此

法門寺一統志在扶風縣北二十里崇正鎮即唐憲宗  
迎佛骨處聞見後錄古塔四層瘞佛手指骨一節憲宗  
盛儀肅迎入禁中塔下層有石芙蓉工製精妙每芙蓉  
一葉上刻一施金錢人姓名殆數千人宮女姓名為多  
又刻白玉像所瘞佛指骨節置金蓮花中隔琉璃水晶  
匣可見通志元和十四年詔改為法雲寺勅學士張仲  
素撰碑宋徽宗有讚并大書皇帝佛國四字於山門之



上

西明寺通志在郿縣西南二十里顯慶三年為元奘法師  
建西陽雜俎孫思邈隱終南石室與宣律師互參元旨  
於此

龍泉寺一統志在汧陽縣十五里龍泉山上唐武德間  
建宋大中祥符間改普濟禪院有碑僧善偽書石墨鐫  
華以為不減聖教序

慈禪寺一統志在麟遊縣東四里杜澄交會處有永徽

四年鐫刻石佛像

興國寺通志在麟遊縣治北門外童山下唐開元十年  
建唐時古松尚存有銀杏樹大四五圍高與山齊明正  
統間禱雨有應

天臺寺通志在麟遊縣西五里天臺山即唐九成宮故  
墟也南面青蓮北負排雲寺內尚存白松古栢

宋張橫渠祠通志在鄆縣大振谷口

本朝康熙二十三年

額曰學達性天又有祠在縣東五十里橫渠鎮先生故居元

元貞間建

真興寺一統志在鳳翔縣城內宋初節度使王彥超建

閣高十餘丈

宋蘇軾真興寺閣詩山川與城郭漠漠同一形市人與鴉鵲浩浩同一聲此閣幾何

高何人之所營側身送落日引手攀飛星當年王中令斫木南山顚寫真留閣下鐵面眼有稜身強八九尺與

閣兩呼嵒古人雖暴恣作事今世驚登者尚吁喘作者何以勝曷不觀此閣其人勇且英又真興寺閣禱雨詩

太守觀從千騎禱神翁遠借一杯清雲陰黯黯將噓施雨意昏昏欲釀成已覺微風吹袂冷不堪殘日傍山明

今年秋熟君知否應向江南飽食便

賢山寺通志在扶風縣東南二十里有塔淳祐五年建  
旁有三洞極幽邃蓋勝迹也

鐵佛寺通志在隴州香泉有鐵佛一軀宋咸平中建元  
祐間重修

金槐北寺通志在郿縣槐芽鎮北一里即古惠濟院大  
定四年賜額南擁太白北環渭水東接柿林西臨清湫  
先是有異僧禪憩於此至金勅修遂為一方勝概焉

雲庵通志在郿縣東南四十里大定間有高僧隱庵中

後有石洞洞中刻達摩像相傳達摩傳法於此

景福宮通志在扶風縣治北正隆間建有仙人張三丰

畫壁

玉清宮一統志在汧陽縣西舊縣東三里大定中建元

至元中重修姚燧撰碑

元大金佛寺通志在鳳翔縣東大德元年勅修世祖鑄

金佛像高尺許重三十五斤賜寺中供養明初失之

成道宮通志在寶雞縣東南六十里渭水之南邱處機

修道於此始名長春觀後改今名

明三賢祠通志在汧陽縣東祀燕伋郭欽段秀實伋從夫子適周欽肥遯於王莽之世秀實死難雋各祀於鄉天啟元年始創此祠高攀龍撰記馮從吾篆額

金臺觀通志在寶雞縣東北一里許張三丰修道之所

古蹟 郊邑

鳳翔府唐虞簾亭雍勝略在郿縣境漢書郊祀志注后稷封釐釐讀如郿或曰鳳翔府郿縣有郿亭桓譚新論

邵在漆縣其民有會日以相與夜中市如不為則有災  
咎

周授經臺雍勝略在鳳翔縣南本終南山峰尹喜既見  
老子授五千言喜退而書之曰道德經後常居此

野人鳴名山記在鳳翔縣南秦穆公失善馬野人得而  
食之者三百人吏捕得欲法之公曰吾聞食善馬肉不  
飲酒傷人皆賜之酒其後秦伐晉三百人皆從報德遂  
脫穆公於難

鳳臺通志在鳳翔縣南十五里水經注雍有鳳臺秦穆公時有蕭史者善吹簫能致白鶴孔雀穆公女弄玉好之公為作鳳臺以居之積數十年一旦隨鳳去雍宮世有簫管之聲焉今臺傾祠毀不復然矣

召亭雍勝略在岐山縣西八里召公村公采邑在此故後人建亭水經注雍水東逕召亭南召康公之采邑也周城通志在岐山縣西北十五里亦曰周公邨水經注岐水之南有周城周城者周公之采邑也



礮溪釣石通志即釣臺在寶雞縣東南礮溪谷中其石

下細上鉅俯臨溪中故老相傳為太公釣魚處有兩膝

所著跡

謹按太公釣魚臺有三一在河南新安城東今去水數丈一在咸陽一在寶雞礮溪谷中其遇

丈王者礮溪也又見大川

號縣鎮通志在寶雞縣東五十里即周武王封號叔地  
隋為號縣元省入寶雞

白起城雍勝略在郿縣東北十五里秦白起所築今遺

址尚存

太王陵一統志在岐山縣東北五十里通志在岐陽鎮  
北俗云幽王陵按幽王陵在臨潼北二十五里太王始  
遷岐下冢在岐陽無疑

秦穆公墓通志在鳳翔縣城內東南隅周圍五丈有奇  
前有碑歲時致祭史記秦本紀穆公葬雍皇覽秦穆公

冢在橐泉宮祈年觀下

謹按史記注謂在雍縣東南二里是在城以外也今城正唐末

李茂貞所築宋蘇軾秦穆公墓詩橐泉在城東墓在城中無百步乃知昔未有此城秦人以泉識公墓昔公生不誅孟明豈有死之日而忍用其良乃知三子殉公意亦如齊之二子從田橫占人感一飯尚能殺其身今人

不復見此等乃以所見疑古人古人不可望今人益可傷

三良冢通志在城南半里許朱子詩傳文公六年秦伯任好卒以子車氏之三子奄息仲行鍼虎為殉皆秦之

良也國人哀之為之賦黃鳥

謹按括地志三良冢在岐州雍縣一里故城內今在

城外是城已改築也

秦武公墓一統志在岐山縣西南史記秦本紀武公葬

雍平陽

臣謹按陝西通志據劉紹周平陽封域辨以秦武公

墓在郿縣考武公葬平陽以平陽為屬郿縣者魏書  
地形志史記裴駰集解胡三省通鑑注是也以平陽  
為屬岐山者括地志史記正義是也又考元豐九域  
志號縣有平陽鎮蓋即平陽故城號縣元時省入寶  
雞而一統志謂平陽故城在岐山縣西南接寶雞界  
地理頗合則以武公墓為在岐山尤為有據今從之  
秦寧公墓一統志在寶雞縣西北史記秦寧公葬西山  
帝王世紀寧公葬西山大麓故號秦陵山括地志寧公

墓在陳倉縣西北三十七里秦陵山

謹按始皇本紀云葬衙與此不同

漢伏波村一統志在扶風縣西七里馬援故居

絳帳村一統志在扶風縣東南二十五里相傳馬融授徒處

郿塢城雍勝略在郿縣東十五里董卓封郿侯築塢高厚皆七丈徙金銀雜物於內積三十年穀俗謂之小長

安水經注渭水東逕郿塢南

宋蘇軾郿塢詩衣中甲厚行何懼塢裏金多退足憑

畢竟英雄誰得似  
臍脂自照不須燈

回中城雍勝略在隴州西北四十里即漢來欽開道處  
斜谷關通志在郿縣西南三十里通鑑元狩中發卒萬  
人作褒斜道魏志郭淮傳青龍二年亮出斜谷田於蘭  
坑賈逵傳正始元年曹真征蜀使賈逵至斜谷觀形勢  
蜀志建興十一年蜀運米集斜谷口治斜谷邸閣十二  
年亮由斜谷出據五丈原雍錄長安可達漢中惟子午  
關子午關在正南次西則駱谷關又西則斜谷關漢王  
自漢中出襲雍則自褒斜出也岐山縣志褒斜二谷阻

衙嶺為首尾雍梁有事為出入咽喉與祁山大散子午  
駱谷並稱要地

大散關通志在寶雞縣南五十二里大散嶺上通褒斜  
後漢書順陽侯嘉傳建武二年延岑引兵北入散關至  
陳倉嘉追破之注散關故城在陳倉縣南十里有散谷  
水因取名焉水經注汧水東入散關唐書地理志寶雞  
西南有大散關中興四朝志大散關屬梁泉縣在寶雞  
南為秦蜀往來要道自關距和尚原纔咫尺兩山關控

斗絕出可以攻入可以守實表裏之形勢也縣志大散關一曰散關在縣西南大散嶺上為秦蜀襟喉南山自藍田而西至此方盡又西則隴首特起汧渭縈流關當山川之會扼南北之交

隴關通志在隴州西七十里隴山下後漢書順帝紀永和四年命扶風樊隴道塢五年羌寇武都燒隴關通典隴山一名隴坻漢隴關今名大震關在縣西雍錄漢武帝至此遇震雷因名大震關方輿紀要宇文周天和中



避諱改關曰大寧亦曰隴山關隋唐復為大震關唐薛  
達改築新關於隴山上西去故關三十里控扼要道與  
故關並為戍守秦雍喉啞隴關當之矣

詳見唐  
安戎關

馬援墓一統志在扶風縣西七里後漢書本傳援卒後  
有上書譖之者帝怒妻孥惶懼不欲以喪還舊塋裁買  
城西數畝地藁葬而已妻子詣闕上書訴冤前後六上  
然後得葬

魯恭墓通志在扶風縣北四十里魯馬村

謹按中牟縣  
志恭墓在縣

西北兗州府志載恭墓在焦氏山南考後漢書本傳恭以老病罷官卒於家則中年諸處皆非實冢

班固墓通志在扶風縣東二十里

三國落星村通志在岐山縣東五十里即蜀漢諸葛亮  
長星墜營處

三交城元和郡縣志在寶雞縣西十六里司馬懿與諸  
葛亮相距所築

石鼻寨通志在縣東四十里武侯築以拒郝昭一名石  
鼻城通鑑唐光啟三年田令孜奉上發寶雞增禁兵守

石鼻為後拒胡三省注蘇軾曰寶雞縣武成鎮即俗所

謂石鼻寨也

宋蘇軾石鼻城詩平時戰國今無在陌上征夫自不聞北客初來試新險蜀人從此

送殘山獨穿暗月朦朧裏愁渡奔河蒼茫間漸入西南風景變道邊修竹水潺潺

晉竇滔墓通志在扶風縣北周秦坡

隋文帝泰陵通志在扶風縣東南四十五里隋書文獻

獨孤皇后仁壽二年八月葬於泰陵高祖文皇帝仁壽

四年十月合葬於泰陵同墳而異穴關中陵墓志陵高

五丈周數百步

謹按元和郡縣志太平寰宇記皆云文帝泰陵在武功縣西南二十里三時原

一統志從之考武功西南二十里已  
交扶風界陵在今扶風境故載於此

唐臨汧城一統志在隴州西北冊府元龜王承元為鳳  
翔節度使於汧陽西北八十里築新城一所賜額為臨  
汧城鳳翔西接涇原無山谷之險吐蕃由是往往入寇  
故承元奏於衝要築壘分兵千人以守之

謹按臨汧城  
新舊唐書皆

在汧陽一統志列入  
隴州蓋本鳳翔府志

隴亭通志在隴州隴山官道旁唐時已有此亭

安戎關一統志在隴州西南冊府元龜大中六年隴州

防禦使薛達言汧源西境切在故關昔有隄防殊無制  
置僻在重岡之上苟務高深今移要會之中實堪控扼  
舊絕泉井遠汲河流今則臨水挾山當川限谷危牆深  
塹克揚營壘之勢謹畫圖進乞改為安戎關唐書地理  
志汧源西有安戎關本大震關薛達移築更名通鑑唐  
天復二年孔勅取成隴二州乃自故關歸後唐乾祐元  
年蜀將韓保貞出新關胡三省注秦州清水東五十里  
有大震關自薛達徙築安戎關於隴山由是謂大震關

為故關今隴山之西有故關山新關在汧源縣西

潘氏堡一統志在寶雞縣東北唐書楊晟傳光啟三年  
守大散關朱玫攻關晟戰於潘氏遂敗通鑑注潘氏堡  
在寶雞東北

模壁寨通志在寶雞縣西南七十里通鑑乾祐初蜀將  
安思謙救鳳翔遣別將趨模壁

箭括關通志在汧陽縣南十五里通鑑梁貞明六年蜀  
將陳彥威出散關敗岐兵於箭括嶺胡三省注其山兩

岐故俗呼為箭括有箭括關宋史吳玠傳紹興三十一年金沒立方攻箭括關玠遣將擊敗之

甘露坊一統志在麟遊縣西唐馬坊也九域志縣有八馬坊

李淳風墓通志在岐山縣東北五里

謹按河南府志李淳風墓在新安縣

畿輔通志在涿州皆無所徵信考唐書淳風岐山人似應以此為正又西安府志藍屋縣東二里亦有淳風墓

楊恂墓通志在扶風縣東北二十里舊美陽城北二里

碑字甚奇古

李茂貞墓通志在賓雞縣北五里

段行琛墓通志在汧陽縣北七十里太尉段秀實父贈揚州大都督

段秀實墓通志在汧陽西六十里太平寰宇記在縣西

北四十里萬善鄉草僻川西

謹按臨潼縣志亦載段秀實墓未知孰是

宋凌虛臺一統志在鳳翔縣東北陳希亮守鳳翔時所

建

宋蘇軾凌虛臺記臺於南山之下宜若起居飲食與山接也四方之山莫高於終南而都邑之最麗者莫

近於扶風以至近求至高其勢必得而太守之居未嘗知有山焉雖非事之所以損益而物理有不當然者此



凌虛之所為築也方其未築也太守陳公杖履逍遙於其下見山之出於林木之上者纍纍如人之旅行於牆外而見其髻也曰是必有異使工鑿其前為方池以其土築臺高出於屋之簷而止然後人之至於其上者恍然不知臺之高而以為山之踴躍奮迅而出也公曰是宜名凌虛以告其從事蘇軾而求文以為記軾復於公曰物之興廢成毀不可得而知也昔者荒草野田霜露之所蒙翳孤虺之所窟伏方是時豈知有凌虛臺耶廢興成毀相尋於無窮則臺之復為荒草野田皆不可知也嘗試與公登臺而望其東則秦穆之祈年索泉也其南則漢武之長楊五柞而其北則隋之仁壽唐之九成也計其一時之盛弘傑詭麗堅固而不可動者豈特百倍於臺而已哉然而數世之後欲求其髻髻而破瓦頽垣無復存者既已化於禾黍荆棘邱墟隴畝矣而況於此臺歟夫臺猶不足恃以長久而況於人事之得喪忽往而忽來者歟而或者欲以跨世而自足則過矣蓋世

有足恃者而不在乎臺之存亡也既已言於公退而為之記人凌虛臺詩才高多感激道直無往還不知此臺上舉酒邀青山青山雖云遠似亦識公顏崩騰赴幽賞披豁露天慳落日銜翠壁暮雲點烟鬟浩歌清興發放意未禮刪是時歲云暮微雪酒袍班吏退跡如掃賓來勇躋攀臺前飛雁過臺上雕弓彎聯翩向空墜一笑驚

塵寰

橋頭寨通志在鳳翔縣東北十五里紹興三十一年吳璘遣別將彭青至寶雞渭河夜劫金人橋頭寨破之

井田通志在郿縣東五十里橫渠鎮南張子所畫未就之井田也

張子厚墓一統志在郿縣東五十里橫渠鎮父涪州守  
迪暨弟戢以下四世墓俱在馬

金橫水鎮通志在鳳翔縣東三十里金史地理志鳳翔  
府舊有橫水鎮

益店鎮通志在岐山縣東三十五里金史地理志鳳翔  
府舊有驛店鎮

羅局鎮通志在岐山縣東南三十五里金史地理志岐  
山馬蹟鎮按羅局鎮在馬蹟里蓋即馬蹟鎮

元射箭臺一統志在寶雞縣西南十里元憲宗入蜀常駐師於此較射碑刻尚存

清風臺一統志在寶雞縣南六十里邱處機所築西倚飛雲壁東臨漱玉溪為一邑最勝處

清湫鎮通志在郿縣東二十五里以近清湫水而名至正十四年達魯所築城址尚存

二里關通志在寶雞縣西南四十里古置關遺址尚存元史鄭鼎傳中統初鼎從伐蜀攻二里散關屢立戰功

縣志居高嶺上長亘二里因名乃連雲棧出入必由之路明初設巡檢司於益門鎮嘉靖間遷於此

益門鎮通志在寶雞縣西南十五里元末李思齊所築以備川蜀洪武三年蜀將王友仁攻興元守將金興旺請援時徐達在西安即帥師還屯益門鎮陝西既入關平行千餘里西南抵寶雞復岸然山合惟一隘口始入是為益門鎮秦山嵯峨清江滉瀟路惟鳥道雲棧百折達荆梁通滇益名鎮以益義取諸此

李思齊墓通志在寶雞縣東三十里

明咸宜關通志在隴州西四十里明正統中因關山路阻改咸宜關移巡檢司於此鑿山開道通秦鳳故關廢為鎮通鑑梁貞明六年蜀使王宗儔等將兵伐岐出故關壁於咸宜胡三省注在隴州汧源界

臣謹按隴山置關始於西漢自漢迄明雖經三徙然咸因山設險總而名之皆隴關也漢曰大震唐曰安戎明曰咸宜考太平寰宇記安戎宋時已廢後此仍

由大震即今隴州西八十里之關山是也前明咸宜  
置關而大震又廢唐宋以大震為故關而安戎為新  
關近時則以關山為故關而咸宜為新關雍勝略云  
左隴山而右汧水面五峰而扼靈谷為秦鳳要害之  
地信哉

本朝大學士党崇雅墓通志在寶雞縣西平原

關中勝蹟圖志卷十八

# 欽定四庫全書

史部

關中勝蹟圖志卷十九至二十二

詳校官太僕寺少卿<sub>臣</sub>李廷欽

編修<sub>臣</sub>程嘉謨覆勘

總校官進士<sub>臣</sub>朱鈐

校對官編修<sub>臣</sub>錢樾

謄錄監生<sub>臣</sub>陸堦



欽定四庫全書

關中勝蹟圖志卷十九

陝西巡撫臣畢沅撰

地理

漢中府釋名通志秦郡常璩曰因水名也府志郡臨漢水之陽南面漢山故名沿革一統志治在省城西南一千七十里禹貢梁州之域春秋時為蜀地戰國初秦楚之境後屬秦置漢中郡

史記秦惠王十三年攻楚漢中取地六百里置漢中郡華陽國

志周赧王二年  
秦惠文王置郡

漢初為漢國後仍為漢中郡屬益州後

漢因之三國屬蜀

通典後漢末張魯改漢中為漢寧魏武復曰漢中郡後蜀先主有其地以

為重鎮 魏景元四年克蜀兼置梁州

王隱晉書魏末克蜀分廣漢巴涪陵以北

七郡為梁州治沔陽 晉因之

晉書地理志泰始三年立梁州於南鄭

東晉隆安中又

僑置秦州宋齊因之梁天監三年入於魏曰梁州漢中

郡大同初還梁西魏廢帝元年復克之隋開皇三年郡

廢大業三年州廢改為漢川郡唐武德初復曰梁州置

總管府開元十三年改曰褒州二十年復故天寶初曰

漢中郡乾元初復曰梁州興元元年升興元府為山南  
西道節度使治五代屬蜀宋曰興元府漢中郡山南西  
道節度為利州路治紹興十四年分為利州路治元為  
興元路屬陝西行省明洪武三年改為漢中府九年屬  
陝西布政使司

本朝因之領縣八曰南鄭褒城城固洋西鄉鳳沔略陽州  
一曰寧羌 府城通志舊址在府東二里秦厲公所築  
漢高祖王漢中時居此宋嘉定十二年徙築今城明正

德五年修築悉甃以磚周九里有奇天啟元年因建瑞藩展北二丈十步門四東曰朝陽西曰振武南曰望江北曰拱宸

南鄭縣釋名通志周邑名秦以名縣者舊傳云鄭桓公遺民南奔漢中故以南為稱府志桓公都鄭其民徙河南者為新鄭奔漢中者為南鄭沿革一統志附郭本秦南鄭邑漢置縣為漢中郡治後漢至南北朝因之隋為漢川郡治唐為興元府治宋因之元為興元路治明為

漢中府治

本朝因之

褒城縣釋名通志郭子章云周褒國漢置褒中縣隋改名褒城沿革一統志治在府西北四十里漢置褒中縣屬漢中郡為都尉治後漢因之晉義熙中改曰苞中劉宋省後魏永平四年復置褒中縣兼置褒中郡隋開皇初郡廢改縣曰褒內仁壽元年又改褒城屬漢川郡義寧二年又改褒中唐貞觀三年復曰褒城屬興元府宋

因之元屬興元路明屬漢中府

本朝因之 縣城通志漢唐建縣於打鐘寺宋徙山河堰

北紹興中兵燬明正德四年蜀有藍鄙之亂巡撫藍璋  
以褒據秦蜀之衝下令修築甃城以石周三里門四

城固縣釋名通志秦縣名方輿勝覽始城而異其鞏固  
之意也沿革一統志治在府東少北七十里漢置城固  
縣屬漢中郡後皆因之唐武德二年改曰唐固貞觀二  
年復故屬興元府宋因之元屬興元路明屬漢中府

本朝因之 縣城通志蜀漢建興七年諸葛亮建樂城魏  
正始中移治壻鄉宋崇寧二年移建今城明正德七年  
拓築磚甃周七里有奇門四

洋縣釋名太平寰宇記後魏置洋州因水為名沿革一  
統志治在府東一百二十里漢城固縣地晉置興道縣  
屬漢中郡劉宋廢後魏延昌三年置興勢縣屬晉昌郡  
西魏分置儻成郡隋開皇初郡廢縣屬漢川郡唐初屬  
洋州貞觀二十三年改曰興道天寶十五載移洋州郡

來治乾元初復改郡曰洋州屬山南西道五代時孟蜀  
改曰源州宋初復曰洋州元至元二年以州治興道縣  
省入屬興元路明初降州為縣屬漢中府

本朝因之 縣城通志宋熙寧間文同守洋州築土為城  
明崇禎七年甃以磚周七里有奇門五

西鄉縣釋名通志太平寰宇記蜀南鄉晉改西鄉府志  
與夔之東鄉對故名沿革一統志治在府東南二百四  
十里漢城固縣地蜀漢置南鄉縣晉改曰西鄉屬漢中



郡宋齊因之後魏改置豐寧縣兼置洋州及洋川郡隋  
開皇中郡廢大業初州廢縣復曰西鄉屬漢川郡唐武  
德初復於縣置洋州天寶初曰洋川郡十五載徙郡治  
興道以西興屬焉宋亦屬洋州元屬興元路明屬漢中  
府

本朝因之 縣城通志宋建於蒿坪山之陽元遷今治建  
城磚土相半明正德中築東關新城嘉靖初患磚甃之  
周三里門四

鳳縣釋名通志方輿勝覽鶯鶯嘗鳴於岐翱翔至南而集焉是以西岐曰鳳翔南岐曰鳳州至明降州為縣沿革一統志治在府西北三百八十里漢置故道縣屬武都郡後漢及晉因之後魏太和元年改置涼泉縣尋改曰梁泉孝昌中又置南岐州西魏廢帝三年改州為河池郡唐武德初復為鳳州天寶初曰河池郡乾元初仍曰鳳州屬山南西道五代初屬岐後屬蜀宋仍曰鳳州河池郡屬秦鳳路元至元五年以州治梁泉縣省入屬

興元路明初降州為縣屬漢中府

本朝因之

縣城通志古鳳州舊治明嘉靖十九年悉焚

以石周四里有奇門三

沔縣釋名通志本漢沔陽以沔水為名也元自略陽移  
沔州來治明降為縣沿革一統志治在府西一百十里  
漢置沔陽縣屬漢中郡後漢晉及宋齊因之後魏析置  
嶓冢縣並屬華陽郡隋初省沔陽縣大業初改嶓冢曰  
西縣屬漢川郡唐武德三年於縣置褒州八年州廢縣

屬梁州宋乾德三年以縣直隸京師

謹按太平寰宇記平蜀後以西縣及

三泉縣路當津要申奏公事直屬朝廷

後屬興元府元

初屬沔州至元二十年省西縣入略陽改置鐸水縣移  
沔州來治後又省鐸水縣入州明初改州為縣屬漢中  
府成化二十二年改屬寧羌州

本朝仍屬漢中府

縣城通志蜀漢建興七年諸葛亮築

漢樂二城漢城即沔城也倚山垣堞以土明洪武四年  
遷於西山谷口沔水環流萬歷元年甃以磚周三里門

四

略陽縣釋名通志用武之地曰略衆山之南曰陽故以  
為名按略陽漢縣也在今鞏昌界後魏僑置略陽郡縣  
於此趙宋遂以名縣沿革一統志治在府西北二百九  
十里漢置沮縣屬武都郡後漢及晉因之後魏正始三  
年置武興鎮尋改置東益州及武興郡西魏廢帝二年  
改州曰興州郡曰順政大業二年罷州為順政郡唐武  
德初復為興州天寶初復曰順政郡乾元初仍曰興州

屬山南西道五代屬蜀宋仍曰興州順政郡屬利州路  
開禧三年改州曰沔州縣曰略陽嘉定三年仍屬利州  
路元至元十四年改屬廣元路二十年移沔州治鐸水  
縣以略陽縣屬焉明初屬漢中府成化二十二年改屬  
寧羌州

本朝仍屬漢中府 縣城通志即古興州城址明正德六  
年築土城周五里門五

寧羌州釋名通志本白馬氏東境成化中設寧羌取輯

寧氏羌之意沿革一統志治在府西南二百八十里漢  
廣漢郡葭萌縣地晉為梓潼郡晉壽縣地隋為義成郡  
綿谷縣地唐武德四年分置三泉縣兼置南安州八年  
州廢縣屬利州天寶元年改屬漢中郡宋乾德三年以  
縣直隸京師至道二年建為太安軍三年軍廢縣仍屬  
京師紹興三年復置太安軍屬利州路元初為太安州  
至元二十年降州為縣屬沔州又省三泉縣入之明初  
省大安入沔縣改置寧羌衛成化二十二年升為寧羌

州屬漢中府

本朝因之 州城通志舊為白馬氏之羊鹿坪明洪武三十年因羌民田九成據馬面山作亂遣指揮姜觀建寧羌衛於此成化二十二年建州於衛治南漢水繞城地勢險固周七百七十餘丈門四

關中勝蹟圖志卷十九



欽定四庫全書

關中勝蹟圖志卷二十

陝西巡撫臣畢沅撰

名山

漢中府寶山在南鄭縣北十餘里輿地紀勝舊傳山中得寶珠故名

旱山在南鄭縣西南二十里通志旱一作岬詩瞻彼旱麓毛傳旱山名漢書地理志南鄭縣旱山池水所出水

經注旱山下有祠列石十二不辨其由蓋社主之流百姓時祈禱焉周地圖記山上有雲即雨傍有石牛十二頭下有石池水雍大記漢山在縣西南三十里四峰八面東臨老渚河北距漢水南接巴山有池水一統志亦

名天池山

謹按旱漢以音近而訛後人遂分以為二山也漢志池水出旱山而雍大記池水出漢山

蓋為可據

獅子山在南鄭縣北四十里雍勝略形如獅子上有寶峰院下有洗佛潭通志潭在獅子山西南水自懸崖下

注其潭有三地險水深

聽山在南鄭縣西北二十七里與地紀勝西抵壻水小溪水經注壻水北發聽山通志俗傳唐公房仙去壻歸惟聞空中歌管聲因名聽山

天臺山在南鄭縣西北七十里通志頂平如臺有飛泉數百尺下為深潭號佛子潭

龍岡山在南鄭縣西十里與地紀勝相傳梁天監中有龍關於此華陽國志龍岡北臨漢水南帶廉津

中梁山在南鄭縣西十五里輿地紀勝漢中記云以其

鎮梁州之中故名

亦見褒城

黃牛山在南鄭縣西南五十里魏書地形志華陽縣有

黃牛山

謹按後魏縣為華陽地

太平寰宇記山有石黃色遠望如

牛因名山下有黃牛川十道記云黃牛川有再熟之稻

土人重之

籠蓋山在南鄭縣西南五十里雍勝略其南麓與巴山

相接老渚河源出於此

峨公山在南鄭縣南六十里通志宋元嘉十一年蕭承之進據峨公山擊敗楊難當軍梁土民思承之功於峨公山立廟祀之

仙臺山在南鄭縣南百九十里太平寰宇記一名玉女山高峻不可登上古城三門道經云玉女所居之地故名輿地紀勝一名米倉山與大巴山相連有韓信廟及截賢嶺云蕭何追韓信至此縣志米倉山高聳摩雲登其巔則褒沔洋鳳俱歸一覽

大巴山在南鄭縣南百九十里接西鄉界一統志亦名巴嶺山水經注廉水出巴嶺山元和郡縣志旁臨漢江與三峽相接山南即古巴國

梁山山在南鄭縣東南百八十里一統志亦名梁山太平寰宇記爾雅云南方之美者有梁山之犀象焉州因山名輿地紀勝其西與孤雲兩角諸山相接大山四圍其中三十里許甚平曠或云古梁州治也

武鄉谷在南鄭縣東北三十里十道志蜀封諸葛亮為

侯國

駱谷在南鄭縣東北百二十里通志自洋之真符至此

屈曲八十里八十四盤姜維伐魏出此

已上南鄭

雲霧山在褒城縣西北七十里通志絕頂有崖高百尺橫數十步縣境高山此為第一上有水痕如龍黑白各四顛倒懸挂其東西橫截者為橫當山乃雲霧山北界也

連城山在褒城縣北六里通志下臨褒水相傳為漢王

練兵處亦名漢王山

鷄翁山在褒城縣北一統志即連城後山也高峰突起  
類鷄冠因名稽神錄唐溫造為興元節度使行漢中大  
雨平地水尺餘不可進乃禱鷄翁山神疾風驅雲即時  
晴霽文宗聞其事封山神為侯

石門山在褒城縣北十里左思蜀都賦岨以石門水經  
注褒水東南逕大石門歷故棧道下谷又東南歷小石  
門石門穿山通道六丈有餘刻石言漢永平中司隸校



尉捷為揚厥所開逮建和二年大中大夫同郡王升琢  
石頌德以為即石門道蜀王時五丁所開厥蓋因而廣  
之門在漢中之西褒中之北後魏王遠石門銘序正始  
元年漢中獻地褒斜始開至石門北一里西上鑿山為  
道峭岨盤紆行者苦之梁秦初附刺史羊公表求自迴  
萬以東開叛道路至永平二年畢工閣廣四丈路廣六  
丈皆填溪棧壑硤險梁危自迴萬至谷口三百餘里連  
輶駢轡莫不通焉縣志石門在縣北鷄頭關下此門通

可避七盤之險南三十步為手爬崖崖南五十步為一

點油石

魏王遠石門銘龍門斯鑿大禹所彰茲巖乃穴肇自漢皇道由國中以宣四方其功伊何既逸

且康去深去阻匪閭匪良西帶汧隴東控樊襄河山雖險漢德是強昔為畿甸今則闕疆永懷古烈跡在人亡不達殊績何用再光水眺收晶林望幽長夕凝曉露晝涵曙霜秋風夏起寒鳥春傷穹窿高閣有車螯螭成炭古道駟牡其駟千載絕軌百雨更新敢刊巖曲以紀鴻塵唐李商隱行至金牛驛寄興元渤海尚書詩樓上春雲水底天五雲章色破巴牋諸生个个玉恭柳從事人入庾杲蓮六曲屏風江雨急九枝燈檠夜珠圓深慚走馬金牛路驛和

陳王白玉篇

臣謹按石牛道即金牛道自沔縣西南至四川之大

劍關口皆謂之金牛道考漢中入蜀之道有二其一即金牛其一謂之米倉自南鄭而南循山嶺達於四川之巴州曹操擊張魯魯奔南山入巴中乃米倉道也今驛路所趣蓋金牛道而米倉為僻徑焉

箕山在褒城縣北二十里輿地紀勝箕山上有池四時不涸俗號秦王獵池山南有穴號丙穴有谷號道人谷即鄭子真隱處水經注丙穴出嘉魚常以三月出十月入地穴口廣五六尺去平地七八尺泉懸注魚自穴下

透入水穴口向丙故曰丙穴下注褒水

七盤山在褒城縣北十里通志在鷄頭關下盤迴七轉

方至山頂由此入連雲棧山頂有洞下有穴大如斗名

魚洞

唐沈佺期夜宿七盤嶺詩獨遊千里外高卧七盤  
西山月臨憲近天河入戶低芳春平仲綠清夜子

規啼浮客空留  
聽褒城聞曙雞

龍峯在褒城縣北二十五里通志巨石峻嶒突出有如

龍首直走烏龍江岸波濤吞吐如龍之吸浪

衙嶺山在褒城縣西北九十八里漢書地理志武功縣

褒斜二水俱出衙嶺山水經注褒水西北出衙嶺山

謹按

縣北九十里  
有馬道山  
山東北有鳳凰山一名太白山  
人縣北九十五里有燕子崖以道里計之疑即衙嶺矣

石笋山在縣北百二十里通志山下有龍潭廣一畝許  
遊者至潭隈相戒無聲歎有之則澈底清潭頃刻渾濁  
見者無不駭心又相近有迴水洞褒水至此潛入崖穴  
東通城固縣壻水河

雲夢山在褒城縣西北五十里牛頭山後一統志俗名  
觀山最高處有雲臺觀觀東一里曰飛仙崖石峯壁立

高三百五十五丈崖下曰龍洞深數步下有石池水自上滴入不溢不涸又西三里有青龍洞深丈餘亦有石池又有聖水洞石井亦深丈餘

赤崖在褒城縣西北一統志褒斜閣道所經亦曰赤岸蜀漢置赤岸庫於此儲軍資趙雲別傳雲有軍資餘絹請悉入赤岸武庫是也通志孔明與兄瑾書曰頃大水暴出赤崖以南橋閣悉壞

牛頭山在褒城縣西二十五里魏書地形志武鄉縣有

牛頭山

謹按武鄉縣今在南鄭魏屬襄中即

太平寰宇記山高百仞其上

雲覆如笠即雨故亦號為戴笠山雍勝略山有巨石似

牛頭其下有靈液泉

女郎山在褒城縣西南八十里水經注漢水南有女郎  
山上有女郎冢裁有墳形山有直路下出不生草木世  
人謂之女郎道下有女郎廟及擣衣石有小水北流入  
漢謂之女郎水輿地紀勝俗呼姑子山

華山在褒城縣西南一百十里通志根盤百里許有洞

高大深邃內有靈湫禱雨輒應

中梁山在褒城縣南三十五里一統志南麓有玉女洞  
溪水自山峽下瀉懸如瀑布又數步有水湧出為玉女  
泉合溪水灌田縣志從山南入褒城有三道東曰猴子  
嶺中曰土地埡西曰石梯口石路崎嶇迤西孤峯特立  
者曰大孤山又西峙立兩河口者曰小孤山

互見  
南鄭

金華山在褒城縣南九十里通志從外望之層巒疊嶂  
包裹有如蓮花自內視之逶邐平曠最為幽勝相近有



青銼山山多杉檜其頂有石如銼

孤雲山在褒城縣南百二十里通志與兩角山相連上有石刻云漢相蕭何追韓信至此玉堂閒話興元南有路通巴州其路深溪峭巖捫蘿摸石一上三日達於山頂行人止宿則絙蔓繫腰縈樹而寢不然則墮深澗其絕頂謂之孤雲兩角彼中諺云孤雲兩角去天一握淮陰侯廟在焉

玉映山在褒城縣南百九十里一統志明嘉靖中始開

有石竇曰麒麟洞可以禱雨通志入洞數里如下井見  
巖溜下垂凝結若柱又歷數門始見泉水淵澄莫測至  
今遇旱必禱

黃鹿谷在褒城縣東二十里太平寰宇記谷中多鹿土  
人亦名黃鹿山輿地紀勝亦名鹿堂谷

褒谷在褒城縣東北十里通志自此入連雲棧西北一  
百五十里入鳳縣界又二百二十里直抵郿縣之斜谷  
今亦謂之南口所謂南口曰褒也史記正義褒谷在梁

州褒城縣北五十里左思蜀都賦良木攢於褒谷注褒  
中縣南口斜谷水源在北南流經褒中故北口曰斜南  
口曰褒同一谷耳長四百七十里水經注褒水自小石  
門又東南歷褒口即褒谷之南口也

已上  
褒城

通關山在城固縣北三十里通志即通關勢水經注壻水  
經通關勢南山高百丈餘高祖北定三秦蕭何守漢中欲  
修北道通關中故名為通關勢輿地紀勝山在壻水北

桃林山在城固縣北四十里雍勝略上有石觀音像隱

然崖壁間其相近有風高山上  
有風洞怒吼不息壓之以大石  
亦吹起又稍東有五峰山五峰  
列如屏

九真山在城固縣北五十里輿  
地紀勝道家謂太白山六百里  
與三嵎山相接大峰上有九真  
玉井

斗山在城固縣西北二十里雍  
勝略與三嵎山對峙脉自三嵎  
迤邐而南迴轉東向一峰聳起  
有似斗杓壻水自北縈繞東出  
上有昇仙觀古稱福地道經云  
斗山有五穴通崑崙隴山武當  
青城長安穴有肉芝得而食之

可延壽

三嵎山在城固縣西北四十里輿地紀勝高聳萬仞中  
多靈藥太平寰宇記周地圖云三嵎山上有三峰如覆  
鼎足

白雲山在城固縣東北三十里通志山東有神崖山南  
有駱駝山西連牛蹄山北接龍泉山多產藥物俗傳張

良辟穀於此

已上  
城固

興勢山在洋縣北四十三里通志一名鎮勢山一名興

勢坂魏書地形志龍亭縣有鎮勢山

謹按龍亭故城在縣東

水經

注小城固城北百二十里有興勢坂諸葛亮出駱谷戍

興勢置烽火樓處元和郡縣志洋州興道縣後魏分置

興勢縣治興勢山上

謹按興道故城在今縣東興勢故城在縣東北

太平寰宇

記在興道縣西北今郡城所枕自然隴勢形如一盆外

險而內有大谷為盤道以上數里始及四門最為險固

篋簿谷在洋縣北十里宋蘇軾篋簿谷偃竹記篋簿谷

在洋州文與可嘗令予作洋州三十詠篋簿谷其一也

府志由土門入循瀘水而陟其上內平外昂一覽山無遺勝人掘地三尺即得水產佳竹舊有亭今廢竹亦蕩然

釋子山在洋縣北十五里通志唐僧法照居於此其山峭削孤危嵯腹有洞僅可容身即唐法照念佛聲聞長安處也因名念佛巖下臨碧潭澄澈如鏡每歲五月五日泛五色泡光彩色奪目

瀘谷在洋縣北三十里一統志即駱谷南口唐書地理

志興道有駱谷路南口曰瀟谷北口曰駱谷輿地紀勝  
駱谷在真符縣屈曲八十里凡八十四盤通志後魏之

瀟成郡以此名

謹按瀟城故  
郡在今縣北

石銚山在洋縣北五十里雍勝略山最高每雨必有雲  
出其頂通志九十四峰高聳連雲上有石椿石箱

漢王嶺在洋縣北七十里通志即駱谷道漢高祖曾經  
此其相近有八里洞在層山中有平原八里故名

寒泉山在洋縣北百二十里水經注陽都坂西連寒泉



嶺漢中記曰自西城涉黃金峭寒泉嶺陽都坂峻崿百  
里絕壁萬尋既造其峰謂已踰崧岱復瞻前嶺又倍過  
之通志仙人李八百居此唐公房師事八百房謁八百  
以杖指崖間泉即湧出清涼特甚因以名山

華陽山在洋縣北百四十里通志唐分置華陽縣在今  
縣北以此名也

子房山在洋縣西四十里通志相傳為留侯辟穀處多  
藥苗山接城固界

祈子山在洋縣南七里通志一名鳳翼山下瞰漢江東枕沙河上有聖母祠祈禱輒應故名俗訛為雞子山山巔有雲即雨旱常禱此

龍亭山在洋縣東二十五里通志昔置龍亭縣於此輿地紀勝赤坂在洋州東龍亭山土色甚赭建興八年魏軍侵漢武侯次城固赤坂以待之即此通鑑地理通釋赤坂為龍亭入子午谷之口

黃金谷在洋縣東八十里通志漢水經其中亦謂之黃

金峽灘石迅惡舟楫難過水經注山有黃金峭水北對  
黃金谷有黃金戍傍山依峭險折七里氏掠漢中阻此  
為戍與鐵城相對昔楊難當令薛健據黃金姜寶據鐵  
城陰平太守蕭祖攻拔之敗退酉水元和郡縣志黃金  
縣西北有百畝山黃金谷其谷水陸艱險語曰山水艱  
阻黃金子午魏曹興伐蜀蜀將王平拒之於黃金谷謂  
此山也

子午谷在洋縣東百六十里元和郡縣志黃金縣有驛

即子午道也舊道在今金州安康縣界梁將軍王神念以舊道緣山避水橋梁百數多有毀壞乃別開乾路更名子午道即此路也府志子午谷有二一在洋縣東一百六十里此漢魏舊道也梁別開乾路在縣東三十里龍亭

三嶺在洋縣東北二百餘里通志蜀漢費禕拒曹興處太白山在洋縣東北唐書地理志真符縣有太白山真符洞輿地紀勝山去真符縣四百五十里面隸鳳翔背

屬真符唐天寶中得玉冊於此

謹按縣圖北至郿縣界二百一十里而太白山

在郿縣東南似不應相去如此其遠舊志謂山在縣北四十五里雖或譏其誤然以道里計之大約不過二百

餘里已

上洋縣

巴山在西鄉縣西南接四川巴州界通志一名巴嶺山

一名大巴山即南鄭之大巴嶺也輿地紀勝巴嶺山在

舊洋源縣南十里

謹按洋源故城在縣南

龍洞在西鄉縣西南石壁嵌空洞凡數十處投以石則

風雨立至

鳳凰山在西鄉縣南十五里通志又相近有阜軍山宋  
吳玠屯兵於此上有擂鼓臺又縣南二十里有元陽洞  
近時龍洞祈雨以瓶投洞中年餘出於元陽洞人皆異  
之

穿石崖在西鄉縣南七十里通志絕壁千仞上有水簾  
宋進士雷忠避兵處削成一壁高不可攀穴容千人白  
雲時聚時散故穴不常見

星子山在西鄉縣南三百里通志洋水源出於此

午子山在西鄉縣東南二十里一統志一名母子山三峰削立二水環流山巔有洞四五深不可測風出入有聲謂之風洞亦謂之午子洞又聖水峽在山之東峽中有泉自穴湧出一日三潮謂之龍泉又飛龍山在午子山左冠朱山在午子山右一名華表山峯巒峭拔紅崖洞在西鄉縣東十里茂林脩竹高閣臨流為邑之勝

饒風嶺在西鄉縣東北一百五十里一統志在漢江北

岸與石泉接界

又見石泉  
已上西鄉

豆積山在鳳縣北一里通志一名龍腦山一名遯跡山  
方輿勝覽唐冲妙先生張果之別隱淳熙中憲使李大  
正大書遯跡山三字鐫於山麓

父子谷在鳳縣北二里通志唐僖宗幸蜀至白石鎮有  
村叟進醴問其居曰父子谷因賜金帛太平寰宇記有  
大小石若相懷抱因名

南岐山在鳳縣南十里雍勝略上有竹雲洞內有湫池



旱禱多應

紫柏山在鳳縣南百三十里通志一名紫栢坂有洞在山巔石壁峻險人不可到太平寰宇記紫栢坂在梁泉縣東周地圖云其山兩頭高狀如龍形一名龍如山山多紫栢方輿勝覽山中有七十二洞仙人多隱於此隴蜀餘聞紫柏山在柴關嶺南相傳留侯辟穀於此下有留侯祠

馬鞍山在鳳縣東南二十里通志安河水出此水經注

馬鞍水東出馬鞍山

鳳凰山在鳳縣東三里通志世傳鳳凰常集於此一統志一名鸞鷟山

玉皇山在鳳縣東八十里一統志山極高寒不生禽鳥絕頂有大石覆如殿宇

御愛山在鳳縣東北三十里方輿勝覽在松林堡側唐韋莊入蜀記大散嶺之北僖宗巡幸歷山下愛玩不能去因名

興趙原在鳳縣東北方與勝覽紹興十二年與金分割  
乃割秦商之半又棄和尚原方山原以大散關為界於  
關內則興趙原為控扼之所

黃牛塞山在鳳縣東北百十里通志宋吳玠將楊從義與

金薩里罕大戰於此

已上  
鳳縣

定軍山在沔縣東南十里雍勝略兩峯對峙山下有坡  
可駐萬軍蜀將黃忠斬夏侯淵於此蜀志建安二十四  
年先主自陽平南渡沔水綠山稍前依定軍山勢作營

夏侯淵將兵來爭先主命黃忠乘高攻之斬淵遂有漢  
中華陽國志定軍山北臨沔水水經注沔陽故城南對

定軍山

謹按沔陽故城在縣東

隴蜀餘聞顧璘云武侯兵書匣在

定軍山上壁立萬仞非人跡可到余兩經其地初視匣  
其色淡紅後則鮮明若更新者殆不可曉雍大記山下

有諸葛武侯墓

詳見  
占蹟

卧龍山在沔縣北一里一統志東連百丈坡上有蓮花  
池池上舊有卧龍亭相傳武侯讀書處

鐵山在沔縣北五里通志宋隆興時姚仲置寨於此以禦金人

潭毒山在沔縣西北八十五里雍大記在舊大安軍之三泉今沔縣地宋紹興三年金薩里罕入興元劉子羽

築壘於此以扼之

謹按舊大安軍三泉故城俱在今縣西南接寧羗界

白馬山在沔縣西五里水經注瀼水逕張魯治東水西有山庾仲雍謂之白馬塞太平寰宇記西縣有白馬山張衡家傳云衡於瀼口升仙時乘白馬後人遙望山上

往往有白馬往來因名

嵎冢山在沔縣西南一百十里接寧羗界隋書地理志

西縣有嵎冢山

詳見寧羗

卓筆山在沔縣南二十五里通志峯巒削起如筆架下有聖水亢旱不涸宋元時禱雨多應

龍門山在沔縣南六十里通志石穴數十丈其狀如門何景明仇池諸山記在官道傍懸壁環合上透碧虛中敞大洞下漱清泉水簾懸夏水柱凝冬宋文潞公宋景

文趙清獻王素韓絳呂汎呂公弼呂大防皆有留題行  
三里又有龍洞蘇元老云自利至興行五百里幾半蜀  
道而巖洞之可喜莫如龍洞重簷厦屋深不可測

武興山在沔縣東北十五里通志東臨舊州河西接百  
丈坡元褒州城在此又百丈坡在縣東北二十里由鳳  
縣南桑坪鋪而入至百丈坡而出路長二百里為古陳

倉道今荒塞

已上  
沔縣

巾子山在略陽縣南三里太平寰宇記山半有洞名硃

沙洞通志一名鳳凰山一名三峰山首冠羣山高聳萬仞卓然壁立有楊難當祠又有對融山在其後

天池山在略陽縣北四十里通志山巔有池方一畝水深丈許冬夏澄滢

八渡山在略陽縣北七十里通志四面險阻林木幽深山溪交萃路列三岐要害之區也縣志山接徽縣界為徽鳳要路

朝陽洞在略陽縣北百二十里通志在白水江邊懸崖



間一名藥水洞有佛宇其內有鍾乳石蓮花盆承石上  
水飲之已疾左壁瀑布十餘尋又雷洞深不可測中殷  
殷有聲又風洞外狹內廣時有風出又雨洞嵌空玲瓏  
頂覆千葉石蓮有水四時傾瀉傳為勝槩

青泥嶺在略陽縣北百五十里通志古棧道也後改道

於白水江九域志長舉縣有青泥嶺

謹按長舉故城在縣北宋余靖過青

泥嶺詩老杜休誇蜀道難我聞天險不同  
山青泥嶺上青雲客二十年來七往還

寶子山在略陽縣西北通志相傳其山產金寶相近有

金史卷之八十三  
卷二十  
天窓山壁上有穴如窓又有萬仞山蒼崖蔽日危峯矗  
雲上有白起寨下枕嘉陵江有關

落叢山在略陽縣西北通志周武帝改落叢郡以是名  
也

藥水巖在略陽縣南七里嘉陵江上方輿勝覽去沔州

城七里南有二石洞洞有泉能療疾

謹按宋改武興  
為沔州即今治通

志兩洞之間有一泉西流入嘉陵江謂之藥水飲之愈

疾上山五里又有石乳洞容千餘人前有一泉不竭

玉女山在略陽縣東南三十里名山記山高千仞雲霞映之不見其巔山半有白石如人冠冕坐於崖間前有白石數層如人侍立狀

飛仙嶺在略陽縣東南四十里方輿勝覽相傳徐佐卿

化鶴昇仙之地上有閣道百餘間即入蜀大道

謹按沔縣雲濛

山亦相傳有徐佐卿事疑其一山連亘而兩載之唐杜甫飛仙閣詩土門山行窄微徑緣秋毫棧雲闌千峻梯石結構牢萬壑歌疎林積陰帶奔濤寒日外澹泊長風中怒號歌鞍在地底始覺所歷高往來雜坐卧人馬同疲勞浮生有定分饑飽豈可逃嘆息謂妻子我何隨汝曹

大丙山在略陽縣東南七十里又小丙山兩山相連左思蜀都賦嘉魚出於丙穴注丙穴在漢中沔陽縣有魚穴二所常以三月取之丙地名也太平寰宇記大景小景二山景字本為丙唐諱改之並在順政縣東西七十里其山峻崖南北相對高百餘丈山衣石髮被於崖際北有穴方圓二丈餘其穴有水潛流土人相傳為丙穴周地圖記云以其口面丙因以為名沮水經穴門而過或謂之大丙水每春三月上旬有魚從穴出躍相傳名

為嘉魚左太沖賦所謂嘉魚是此山也

臣謹按水經注丙水上承丙穴下注褒水據此丙穴當在褒城而劉逵蜀都賦注謂在沔陽縣太平寰宇記因以為沮水所經二者不能相合雍勝略又以寧羌州有嘉魚洞為即丙穴其餘在褒沔之間漢川南北魚洞不一其處通志謂地氣相類魚自穴出者多而人皆欲假丙穴以美其名紀載或多失實其說信矣臣又考前代地志所載丙穴不獨在漢中如巴陵

昆陽皆有之而蜀中尤多若邛州大邑縣萬州梁山縣達州明通縣並稱有丙穴產嘉魚則又紛然不可悉數矣至一統志略陽丙穴蓋本太平寰宇記通志列入沔縣而以略陽之二景山為悞然考略陽接壤沔縣略陽之東南即沔縣之西北通志謂在沔縣西北八十里覆其地理與在略陽者實則一山今從一統志載之

石鑑山在略陽縣東北通志山崖當中一石片方廣尺

餘光明可鑑

已上  
略陽

嵯冢山在寧羗州北九十里接沔縣界書禹貢導嵯冢  
至於荆山孔傳漾水出嵯冢在梁州山海經嵯冢之山  
漢水出焉而東流注於沔張衡西京賦終南太乙連岡  
乎嵯冢潘岳西征賦跨平原而連嵯冢通典漢中金牛  
縣嵯冢山禹導漾水東流為漢水唐六典山南道名山  
曰嵯冢漢中記嵯冢以東水皆東流嵯冢以西水皆西  
流故俗以嵯冢為分水嶺通志背連氐道前接葭萌東

西兩漢界以分流梁益二州雄為扼塞踞褒沔之上游

當巴蜀之門戶

唐盧照隣早度分水嶺詩丁年遊蜀道班髻向長安徒費周王粟空彈漢史冠

馬蹄穿欲盡  
峽破轉寒層  
水橫九折積  
石凌七盤  
重溪既下漱峻峯亦上干隴頭聞戍鼓嶺外咽飛湍瑟瑟

松風急蒼蒼山月圓傳語後來者行路誠獨難

臣謹按岫冢有二一在秦州漢地理志隴西郡西縣

有岫冢山考漢之西縣在今秦州界山為西漢水所

出乃雍州山一在寧羗州後魏地形志岫冢縣有岫

冢山此則東漢水所出蓋魏岫冢縣本漢沔陽縣地



隋為西縣唐為金牛宋為三泉元為大安見於隋志  
通典元和郡縣志太平寰宇記元大一統志諸書者  
胡渭云自後魏以來地名六變而山則一皆古梁州  
之域其為禹貢之嵎冢無疑至山海經漢水出鮒鰌  
山亦即茲山之異名惟漢地理志山海經注華陽國  
志所指漾水出嵎冢在氐道縣今不知氐道故縣所  
在宜從闕疑之義焉

蓮屏山在寧羌州北十里通志羣峯秀聳如蓮花又如

屏障故名

滴水巖在寧羗州北三十里輿地紀勝在大安軍西七十里兩山峭拔其中一峯有飛泉千丈下至山根漱石成五花

龍門山在寧羗州西北一百五里輿地紀勝山下有龍洞深七十三步廣半之兩傍石壁嵌空若龍鱗甲皆具其下皆平石水行其上

魚山在寧羗州西北百五十里輿地紀勝龜山與魚山

同在江北人有龍山在江南通志魚山在陽平關嘉陵江北巋然獨高頂平而濶相傳昔武侯屯兵於此

壺子臺山在寧羗州西南四十五里輿地紀勝自韓溪西四十餘里水出巖下成潭潭口湍流成溪下流五里平地突出一峯如浮圖狀上干雲霄謂之壺子臺

嘉魚洞在寧羗州南七十里雍勝略在西流河崖畔秋冬水涸則魚藏春夏水漲則魚出味美似鮓所謂出自沔南之丙穴即此

五丁山在寧羌州東北四十里一統志其峽曰五丁峽  
亦曰金牛峽相傳即秦作五石牛給蜀蜀王令五丁開  
導引牛處峽口懸崖萬仞水自峽中噴薄而出下合漢  
水為蜀道之最險者峽南兩崖峙立懸崖兩大石東崖  
為石鼓西崖為石鐘

玉簪山在寧羌州東北六十里通志山有要領亭為一  
郡登覽之要其後最高處曰鷄冠山

天池山在寧羌州東北七十里通志層巒疊嶂迥出羣

峯其上有池四時不涸有寒氣逼人莫敢近近則雷電立至

龍洞一在寧羌州東北百里通志自高而下凡丈餘洞三十重皆有二石柱為之障限內有天生石牀牀下水不竭遇旱取水雨即至一在州西百五十里洞出崖間有天然石梁如龍門狀中有石像

已上  
寧羌

關中勝蹟圖志卷二十